

## Script of Evening Gojri News Bulletin 26April 2026 at 1700Hrs

ایوننگ گو جری نیوز بلیٹن مورخہ 26 اپریل 2026

یوہ آکاشوانی جموں بے عبدالمجید تے عبدالرحمان شاہین تیں خبر سٹو پہلاں خاص خاص خبر۔

### Headlines

- \*1- وزیر اعظم نریندر مودی نے آج ملک گا جوہری سائینسداناں غی تعریف کی ہے ، جنہاں نے کلپکم فاسٹ بریڈر نیو کٹر رییکٹر نانہ جوہری اہمیت تک پُجا غے عملی مرحلہ ماتہ داخل کر دتو ہے۔
- \*2- آکاشوانی ور اپنا من کی بات پروگرام ماتہ وزیر اعظم نے مردم شماری غی جا ری مہم ماتہ عوام غی مکمل شرکت غو مطالبو کیو ہے تے اس دوران فراہم کی گئی معلومات نانہ مکمل طور ور محفوظ رکھن غو دعوو کیو ۔
- \*3- لیفٹنٹ گورنر منوج سنہا نے " من دیوس " ماتہ شرکت کی تے اعضاء عطیہ کرن آلاں تے اُن اہل خانہ غو شکریو ادا کیو۔
- \*4- وزیر اعلیٰ عمر عبداللہ نے جموں کشمیر غا تعلیمی شعبہ نانہ فروغ دین غی خاطر نجی یونیورسٹیاں غی سرمایہ کاری ور زور دتو تے نواں پرائیوٹ یونیورسٹی ایکٹ غے تحت سرمایہ کاری واسطے معرف اداراں نانہ مدعو کیو ۔
- \*5- جموں غا میدانی علاقہ ماتہ گرمی پے رہی ہے تے درجہ حرارت 40 ڈگری سلیسس تک پُج گئیو ہے۔

خبریں غی تفصیل نال پہلاں عبدالرحمان شاہین۔

### PM MKB

وزیر اعظم نریندر مودی نے آج ملک گا جوہری سائینسداناں غی تعریف کی ہے جے انہاں نے کلپکم فاسٹ بریڈر نیو کٹر رییکٹر نانہ جوہری اہمیت تک پہنچا غے بھارت غا وقار ماتہ اضافو کیو ہے ۔ آکاشوانی ور اپنا پروگرام من کی بات ماتہ قوم سنگ خطاب کرتاں واں جناب مودی نے کہیو جے کر پٹکلٹی ور مرحلو وے جد کوئی رییکٹر پہلی بار کامیابی غے سنگ خود برقرار رہن آلو جوہری سلسلہ وار رد عمل حاصل کرے۔ یوہ مرحلو اس گل غی نشاندہی کرے، جے رییکٹر آپریشنل مرحلہ ماتہ داخل ہوچکو ہے ۔ وزیر اعظم نریندر مودی نے اس نانہ بھارت غا جوہری توانائی غا سفر ماتہ اک تاریخی سنگ میل قرار دتو ہے ۔ انہاں نے اس گل ور زور دتو ہے جے یوہ جوہری رییکٹر مکمل طور ور مقامی آبائی یعنی دیسی ٹیکنالوجی سنگ تیار کیو گیو ہے ۔ اس بارے بولتاں واں وزیر اعظم نریندر مودی نے اس طرح کہیو۔۔ بانٹ۔۔ وزیر اعظم نریندر مودی نے ہوا سنگ حاصل ہون آلی توانائی غی اہمیت ور وی گل کی تے کہیو جے یاہ طاقت بھارت نانہ اگے بدھا رہی ہے ۔ انہاں نے خوشی غو اظہار کیو ، جے بھارت نے حال ہی ماتہ ہوا غی توانائی غا شعبہ ماتہ اک بڑو سنگ میل حاصل کیو ہے ۔ بھارت غی ہوا سنگ بجلی پیدا کرن غی صلاحیت ہون 56 گیگا واٹ تیں تجاوز کر چکی ہے۔ اس

بارے وزیر اعظم نریندر مو دی نے مزید اس طرح کہیو۔۔ بائٹ۔۔ وزیر اعظم نریندر مو دی نے جاری مردم شماری مہم ور وی روشنی کہلی۔ انہاں نے کہیو جے ہر بھارتی نانہہ اس مہم بارے بیدار ہونو چاہیے تے آگاہ رہنو چاہیے، جہیڑی دُنیا غی سب تیں بڑی مردم شماری ہے۔ جناب مو دی نے وضاحت کی جے مردم شماری 2027 نانہہ ڈیجیٹل شکل مانہہ درج کی جارہی ہیں۔ انہاں نے سارا لوکاں نانہہ اپیل کی جے وے اس عمل مانہہ حصولیں تے مردم شماری 2027 نانہہ کامیاب بناویں۔ وزیر اعظم نریندر مو دی نے مزید اس طرح کہیو۔۔ بائٹ۔۔ وزیر اعظم نریندر مو دی نے کہیو ہے جے مئی غو مہینو اک پوتر آغاز غے سنگ ہورہیو ہے، کیونجے پہلی مئی نانہہ بُدھ پُرنیما منائی جائے گی۔ انہاں نے سب نانہہ نیک تمنا پیش کی ہیں تے کہیو ہے جے بھگوان بُدھ مت غی تعلیمات بارے بولتاں واں وزیر اعظم نریندر مو دی نے اس طرح کہیو۔۔ بائٹ۔۔ وزیر اعظم نریندر مو دی نے یوہ وی دسیو جے بھارتیہ قومی دستاویز کانہ نے 20 کروڑ تینزیا دہ قیمتی دستاویزات نانہہ ڈیجیٹل بناغے عوام واسطے دستیاب کر دتو ہے۔ ان دستاویزات مانہہ رانی لکشمی بھائی غے متعلق گجھ اہم خطوط وی شامل ہیں۔ جہیڑا 1857 مانہہ اُن فیصلان نانہہ ظاہر کریں۔ جناب مو دی نے سامعین یعنی سنن آلاں نانہہ اپیل کی جے وے بھارت غی تاریخ غا شاندار تجربہ واسطے

[WWW.abhilekh-patal.in](http://WWW.abhilekh-patal.in)

کریں۔۔ بائٹ۔۔ وزیر اعظم نریندر مو دی نے اُس ٹیم غی وی تعریف کی جس نے اس مہینہ غا آغاز مانہہ فرانس غا شہر بورٹو مانہہ منعقدہ یورپین گرلز میتھا میٹکل آو لمپیاڈ مانہہ حصولیو تے چھٹو مقام حاصل کیو۔ اس با صلاحیت ٹیم مانہہ ممبئی غی شریا مُندھرہ، تھیر و ننتھ پورم غی سنجنا چاکو چنئی غی شیوانی بھارتکمار تے کولکتا غی شریموئی بیرا شامل تھیں۔ وزیر اعظم نریندر مو دی نے اس گل ور وی فخر غو اظہار کیو جے بھارت غا 2 چیز یعنی پنیر غا برانڈز نے برازیل مانہہ منعقدہ اک بین القوامی پنیر مقابلہ مانہہ معزز اعزازت حاصل کیا ہیں۔ انہاں نے کہیو ہے جے بھارت غی دودھ غی مصنوعات یعنی ڈیری شعبہ مانہہ بڑی تبدیلی آرہی ہے تے بھارتی پنیر عالمی سطح ور اپنی پشان بنا رہیو ہے۔

مزید خبراں نال عبدالمجید ور اُس تیں پہلاں یوہ سَنیو۔

**LG Naman Diwas**

اعضاء عطیہ کرن آلاں تے ان کا افراد کنبہ غا اعزاز واسطے وقف "نمن دیوس" غی اک تقریب مانہہ لیفٹنٹ گورنر منوج سنہا نے شرکت کی۔ ایل جی نے اعضاء عطیہ کرن تے اُن غا خاندان غا لوکاں غو شکریو اسا کیو تے کہیو ہے جے وے بے شمار زندگیاں مانہہ خوشی لیاویں۔ گردہ تے کورنیا یعنی انکھ غا سب تیں بیرونی حساس حصہ نانہہ عطیہ کرن آلاں غا اہل کانہ گا اجتماع نال خطاب کرتاں واں ایل جی نے اس گل ور زور دتو جے کوئی وی اعزاز کسے وی اعضاء غا عطیہ غی قدر غے صحیح معنی مانہہ بروبر نہیں ہو سکتو تے عطیہ کرن آلا مہارا معاشرہ غا حقیقی مثالی کردار تے ہیرو ہیں۔ اس بارے انہاں نے مزید اس طرح کہیو۔۔ بائٹ۔۔

**CM Private University**

وزیر اعلیٰ عمر عبداللہ نے اج بنگلور مانہہ تعلیمی شعبہ غا نمائنداں سنگ گل بات کی، جس مانہہ حال ہی مانہہ جاری کیا گیا جموں کشمیر پرائیوٹ یونیورسٹی ایکٹ غے ذریعے

پیدا ہون آلا موقعاں ور لو پائی۔ وزیر اعلیٰ نے میٹنگ غے دوران اِداراں نانہہ اعلیٰ تعلیم غا شعبہ مانہہ سرمایہ کاری کرن تے جموں کشمیر نانہہ اک متحرک تعلیمی مرکز بنان غی خاطر شراکت دار بنن غی دعوت دتی۔ نواں ڈھانچہ غی اہمیت اُجاگر کرتاں واں وزیر اعلیٰ نے کہیو ہے جے یاہ معروف اِداراں واسطے جموں کشمیر مانہہ کیمپس قائم کرن غا خاطر خواہ موقع فراہم کرے۔ جہیڑو اک جدید جامع تے عالمی سطح ور مقابلاجاتی اعلیٰ تعلیمی ماحولیاتی نظام نانہہ باہدو دئیے۔ اُنہاں نے اِس گل نانہہ دُہرایو جے انتظامیہ شفاف ماحول فراہم کرن ور زور دے رہی ہے جس غو مقصد طالب علماں نانہہ راغب کرنو ہے۔

-----

## Weather

کشمیر مانہہ وقفہ وقفہ نال بارش غی وجہ گرمی غی لہر تیں راحت ملی ہے تے ایان جموں غا میدانی علاقان مانہہ سخت گرمی پے رہی ہے۔ تے درجہ حرارت 40 ڈگری سلیسس غے نیڑے پُچ گیو ہے۔ شہر غو درجہ حرارت 39.5 ڈگری سلیسس ریکارڈ کیو گیو جہیڑو معمول تیں تقریباً 5 ڈگری زیادہ ہے۔ اواں کہٹ و کہٹ درجہ حرارت 22.8 ڈگری سلیسس درج کیو گیو ہے۔ دن غے وقت شدید گرمی نے شہر غی سڑکاں تے گلیاں مانہہ دوپہر ویلے لوکاں غی نقل و حرکت محدود کر دتی ہے تے گذشتہ 2 تیہاڑاں تیں گرمی غی شدت مانہہ باہدو ہوئو ہے۔

-----